

18 DEC 2000

Mahathir-Rombakan

DR MAHATHIR AKAN ADAKAN ROMBAKAN KECIL PENTADBIRAN

KUALA LUMPUR, 18 Dis (Bernama) -- Datuk Seri Dr Mahathir Mohamad hari ini berkata beliau akan mengadakan satu rombakan kecil melibatkan anggota pentadbiran kerajaan.

Perdana Menteri berkata rombakan itu tidak akan membabitkan jawatan menteri.

"Hendak rombak kabinet (secara besar-besaran) tidak adalah, (cuma) rombak (sedikit) itu ada, kot masuk (umpamanya dengan kemasukan) orang baru...itu boleh jadilah.

"Kadang-kadang kita suaikan Setiausaha Parlimen ke...Ia tidak (bukan merupakan rombakan) kabinetlah tetapi anggota peringkat pentadbiran," katanya kepada pemberita selepas menghadiri majlis berbuka puasa anjuran Wisma Putra di sini, mengenai kemungkinan beliau akan mengadakan rombakan kabinet.

Dr Mahathir diminta mengulas laporan muka depan akhbar Utusan Malaysia hari ini yang menyatakan rombakan kabinet, dijangka melibatkan 50 peratus pertukaran portfolio Menteri, Timbalan Menteri dan Setiausaha Parlimen sedia ada, akan diumumkan dalam tempoh terdekat ini.

Laporan itu turut menyebut rombakan kabinet itu dijangka menyaksikan kemunculan semula Kementerian Undang-undang dengan menterinya juga dilantik sebagai Peguam Negara.

"Saya tidak tahu apa-apapun, dia orang (Utusan Malaysia) yang buat spekulasi pasal Tengku (Datuk) Adnan (Tengku Mansor) jadi senator. Jadi dia (Utusan) ingat dia (Tengku Adnan bila sudah) jadi senator tentulah dia hendak masuk kabinet dan kita akan ada rombakan kabinet.

"Saya cuma tahu daripada Utusanlah... kena tanya Utusan," kata Perdana Menteri mengulas lanjut laporan itu.

Ditanya bilakah rombakan kecil itu akan dilakukan, beliau berkata: "Ada masa lagi tidak perlu terburu-buru. Insyallah mudah-mudahan."

Ketika ditanya apakah rombakan kabinet perlu diadakan sekarang, Dr Mahathir berkata beliau tidak nampak sebab perlunya ia dilakukan walaupun mengakui beban kerja semakin bertambah.

Ditanya sama ada kebelakangan ini ada menteri yang meminta digugurkan daripada jawatan, Perdana Menteri berkata tidak ada seorang pun menteri meminta digugurkan.

"Saya tidak ada rancangan hendak tukar menteri pun. Menteri saya bagus-bagus belaka," katanya.

Kepada satu soalan sama ada beliau bercadang untuk mewujudkan kementerian baru dan melantik menteri baru, Dr Mahathir berkata: "Saya tidak terfikir hendak tambah, banyak dah ini (kementerian yang sedia ada) kerajaan kita besar."

Ditanya sama ada beliau akan mengisikan jawatan Setiausaha Parlimen Kementerian Penerangan yang masih kosong dalam rombakan kecil pentadbiran itu, Dr Mahathir menjawab: "Mungkin, mungkin."

Terdahulu, Perdana Menteri mengadakan dialog tertutup selama sejam dengan ketua-ketua perwakilan asing yang beragama Islam sebelum majlis berbuka puasa bersama yang turut dihadiri para pegawai kanan Kementerian Luar.

-- BERNAMA

NY HS RON